

[0]我唔係鹹濕仔

[1]

我唔鍾意作文堂要寫「我的爸爸」。我好鍾意我阿爸，但係，我實在唔想話俾我啲老師同埋同學聽，我阿爸係做乜嘢嘅。

我阿爸其實係.....開報紙檔㗎。我知道阿爸工作好辛苦。每日一大朝早，個天仲係好黑個陣時，阿爸就要起身開始佢一日嘅工作。佢話俾我聽，佢要起身起得比任何人都早，因為屋邨裏面個最早起嘅客人會俾十蚊佢買報紙。

[2]

阿爸嘅指頭總係黑黢黢。我知道其實係報紙嘅油墨，混埋阿爸啲手汗，搞到佢隻手黑晒。阿媽本來都買咗對棉手套，叫阿爸戴住去賣報紙。但係阿爸用咗兩日，就將手套扒埋一邊。佢覺得手套減慢咗佢派報紙嘅速度，啲顧客成日都好趕，唔慢得㗎。於是阿爸對手，長年累月積滿咗油墨，啲油墨滲入皮膚入面，洗唔甩。

阿爸嘅背脊有啲彎，因為佢成日要坐喺張好細張嘅圓摺櫈上面做買賣找贖嘅工夫。其實阿爸都算高大，但係因為佢個背脊彎咗，令佢矮咗成截。我成日喺度諗，如果阿爸可以企返直條腰，佢會比嗰個肥仔明嘅老實高最少成個頭！

[3]

肥仔明係我今年嘅同班同學。原來佢住喺我屋企附近。我好討厭佢。佢成日同陳明坤、李志傑一齊笑我係「鹹濕仔」。我當然知道點解佢哋會噉樣笑我。但係，我比佢哋都正人君子啊。我間中會一個人幫阿爸睇下報紙檔，等佢可以去隔離個投注站買馬仔。如果個陣時肥仔明佢哋經過，噉我就慘喇。佢哋會喺檔口前不停噉笑我，話我鹹濕仔喺度賣鹹濕書，直到佢哋見到我阿爸喺有幾遠行返嚟，佢哋先即刻跑走。

我當然知道阿爸做嘢好辛苦，辛苦到天未光就要爬起身；辛苦到對手都黑晒，個背脊又彎埋。阿爸賣啲雜誌都只係為咗搵多啲錢，我知道。所以，我都唔敢話俾佢同阿媽聽我成日因為噉俾啲同學恥笑。

[4]

呢個星期作文堂，又要寫「我的爸爸」。黃老師話，年級唔同，寫嘅題目即使一樣，都會有唔一樣嘅內容同埋深度。老師叫我哋喺屋企預備一下，小心觀察，過幾日就喺堂上寫篇關於父親嘅文章。落咗堂之後，我返去報紙檔幫阿爸手睇檔。有時候，我會故意將啲報紙分散啲噉擺，用佢哋覆蓋住啲雜誌。但係，用報紙遮掩其實都唔係好得，因為有時報紙啲圖片都好恐怖。不過，阿爸好快就

會發覺呢啲遮遮掩掩。然後，佢會鬧我點解要顧客自己搵佢哋要嘅嘢，又鬧我點解唔收拾好個檔口。噉阿爸又唔會鬧得好惡，我都會乖乖噉幫佢收拾返，將我之前覆上去雜誌嗰啲報紙疊好。於是，雜誌女郎嗰啲近乎冇著衫嘅身體同報章上嘅血漿又重現眼前。其實，雜誌報章上啲文字，我都唔係完全明白，好多時都唔係好知佢講乜。只係見到嗰啲影像，已經覺得好唔舒服，但又感到好好奇。

[5]

我又見到肥仔明喺街尾向住我個報紙檔走過嚟。肥仔明經過報紙檔，又對住我伸脰扮鬼扮馬整色整水。佢仲夠膽死喺阿爸面前用唇語唔發聲叫我「鹹濕仔」。阿爸睇到喇！佢好兇狠噉望肥仔明一眼，肥仔明就即刻跑開。阿爸又望住我，問：「阿生，點解佢叫你鹹濕仔？」我耷低頭，用手指指下啲雜誌，好細聲噉話：「阿爸，我都唔鍾意俾人叫做鹹濕仔……」阿爸即刻話：「唉，阿生，你知唔知道，我哋都要搵食嚟。阿爸讀書唔多，自細跟根叔開報紙檔，我淨係識開檔嚟咋。好多年我都有再賣嗰啲要用膠套封住嘅書喇，你知道嚟，係咪？噉呢啲雜誌……都只係閒書嚟啫，冇乜嘢嘅……賺錢咁嘛，好多人買嚟睇嚟……」阿爸雖然讀書唔多，外表又粗魯，又會跟朋友買下馬，但係佢好少郁手郁腳打人，粗口都唔多句，仲成日同我講道理，好多人都叫佢做斯文報紙佬。佢繼續解釋，我已經聽唔入耳。諗起聽日堂作文堂，我決定好似以前噉，寫我阿爸係一位文員算喇。

[6]

到咗作文堂喇。題目係：我的爸爸。黃老師先請幾位同學喺班上介紹佢哋嘅爸爸。陳瑞芳個阿爸係一個消防員。古淑瑩個阿爸係一個菜販。劉福明個阿爸係巴士司機。「張得生，你呢？」我已經將個頭耷到好低，估唔到老師都仲會揀中我。我都未企起身，肥仔明就喺個位度大叫：「張得生個老竇係賣鹹書嚟！」接住落嚟，我就聽到全班同學一齊喺度大笑！我感覺到我塊面好熱，然後耳仔啦，條頸啦，直到全個人全身都好熱。我坐喺個位度，唔敢郁。黃老師就對全班同學講：「張得生嘅爸爸有個報紙檔。王偉明，報紙檔度有好多唔同嘅報章雜誌，又有漫畫書，仲可能有啲小玩具呀，香口膠呀、紙巾噉，點解你淨係會話佢爸爸賣色情刊物呢？唔通你對眼淨係見到呢啲？」全班同學又一齊大笑。

[7]

小息嘅時候，黃老師約咗我傾計。個班房一個人都有，佢問我王偉明係咪成日噉樣笑我，又問我鍾唔鍾意我阿爸賣嗰啲報紙雜誌。佢又話俾我知其實佢都唔鍾意嗰啲雜誌，有時讀完一啲報紙都想嘔，問我會唔會。我一直係噉點頭。佢問我：「你認為可唔可以叫爸爸唔好賣呢啲報紙雜誌呢？」我諗一諗，諗返起阿爸嚟日講過嗰番說話，我有出聲。「係唔係好困難？」我又點下個頭。「噉可以點做呢？」呢個時候，上堂鐘聲響起。「張得生，要去上堂喇。不如你返屋企諗下，聽日我哋再傾，好唔好？」黃老師輕輕拍咗我個膊頭一下，然後就催我去球場集隊。

[8]

放咗學之後，我一個人返屋企。阿爸噶日話我知，我唔使再去報紙檔幫忙喇。佢話我大個仔，可以一個人留喺屋企。返到屋企，我諗返起黃老師番說話，諗返起肥仔明喺全班面前笑我，又諗返起黃老師點樣教訓肥仔明，心裏面一陣時又嬲一陣時又開心。諗下諗下，就瞓著咗。

突然，電話響起。原來係阿爸。佢叫我買份三文治拎去報攤俾佢。

啊！阿爸重新擺放過嗰啲報章雜誌！以前，雜誌都放喺檔口正中間。今日，佢將啲雜誌都放咗喺檔口旁邊。前面堆滿咗啲小玩具、貼紙。當然，都有幾份報刊。呢個始終係報紙檔。阿爸同我講：「阿生，我做到嘅就係得咁多……你要好好讀書，將來……」阿爸又開始說教喇，我不停係噉點頭：「哦，哦，知道喇，知道喇……」我個心諗，肥仔明應該都仲係會笑我，但我知道，阿爸同我都唔係鹹濕仔。聽日，我一定要將呢件事話俾黃老師聽。

(原稿<<我不是鹹濕仔>>寫於2005年。2021年翻成粵語。)

00282:《我唔係鹹濕仔》I Am Not a Lustful Guy

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text

"I Am Not a Lustful Guy" (Cantonese), written by 趙婉慧, illustrated by Kenneth, published by HamBaangLaang (© HamBaangLaang, 2022) under a [CC BY 4.0](#) license on hambaanglaang.hk

[Find out more here: [HamBaangLaang Attribution terms and CC 4.0](#)]
